

郝文忠公全集

邵文忠公全集

郝文忠公陵川文集卷十一

歌詩

西陵行

漢鼎已移心未已不肯分明作天子冕旒北面稱警蹕造
偽萬般難免死臨終更不謀禪代竊國規模有不在人間
解著鬼欺人地下還將縛鬼賣漫言題作征西墓誰信西
陵亦虛墓又說譙都九烏井臭腐掘埋祇幾處銅雀臺邊
聞歌舞兩眼難看滿黃上河須析履更分香涕淚吟嚶效
兒女君不見永安宮中漢昭烈重向孔明託後主付君一
片討賊心嗣子不才君自取天下英雄只玄德操等區區

真溷鼠

書畫錦堂碑後

兩朝定策推元勲君模楷法歐陽文豐碑突兀大字書目
射猶有五色雲德並汾陽盡終始器如霍光學問美孔明
才具汲黯直社稷大臣無與比西北無事中國安三十年
來只一韓乾坤都著錦繡裏笑殺錢王衣錦山身安即是
蒼生福畫錦名堂公所辱君不見萊公眼孔似車輪美錦
裁來便累足

朝歌行

壯哉茲城冠河山老玉回抱青孱顏建邦立極古有制何

乃獨在河朔間獨夫智力制天下瞰視中原強王霸誰知
天與六州王八百諸侯已從化摘星樓頭醉未醒酒池一
夜蜚血驚成湯高宗遂不祀珠宮瑤臺爲土平我來感歎
重延佇驅車不入朝歌路陰風莽蒼吹短衣落日投文比
干墓

比干墓

斫脛河南比干墓崔嵬尙是武王土一邱直欲壓太行一
死能令重于古國亡突兀見真純龍逢與君冠夏殷無人
語與魏鄭公良臣不幸爲忠臣已醢九侯紂猶怒箕子佯
狂微子去三仁一仁獨殺身剖心庶使王心悟王終不悟

國遂亡朝歌無人至今荒行人只拜比干墓有因
臣獨
不亡

共山行

吾生嗜奇能討幽足跡徑欲窮九州會稽未得探禹穴太
行先作共山遊是時天地方閉塞固陰沍涸山靈愁誰知
真宰爲我起蟄窟喜氣奕奕山光浮雲容煙影變態出脉
絡盡露峯巒稠宏富屹天造峭截窮彫鏤峩峩鰲脊一翠
萬里壯綰出元氣直入東海頭中間膏腴甲天下匱奇孕
秀無與侔雲根漲波璃寶藏劃不收玉鏡面寒瑩皦皦明
珠流泓澄百丈底錦石埋黃虬老蟾噴彩忽蕩動萬山破

碎翻神湫竹間老樹掛山骨綠玉葱錯風颼颼不見孫公
和荒臺等陵邱萬籟暗不鳴遂古空悠悠何時無名公說
破先天由一笑碧山下弄月凌虛舟舉手謝浮世醉卧三
千秋卷藏神紐入化府從渠菌蠢還蜉蝣

太行望

半天遮斷連青城參差雉堞雲間橫當時十歲初渡河舟
中錯愕來相迎今年恰得到蘇門百泉亭上更崢嶸千岳
萬壑入絕壁落日倒銜山盡赤玉立萬仞磔鯨牙金翠千
層擁鰲脊天沈影重看不足雲淨煙虛晚尤碧西北兩峯
寒云是雙石人不覺淚橫臆患難思二親一從戎馬三十

蘇文忠公集 卷十一 三
年桑梓慘澹埋荆榛何時突兀過絕頂拜掃邱園見鄉井
黃沙神頭聞有千尺松灑盡苦淚吟長風注目直向東海
東

三汊北城月榭翫月醉歌

大河奔放千里一片黃鰲頭傑觀突起河中央露華漲冷
濯桂窟氛露洗盡豁四旁濤山隱映生金輪水天不辨渾
金光杳然坐我月宮上星斗錯還雲錦裳玉虹高挂飲酒
海黃流倒卷都淋浪兩行美人列嫦娥翠綃深夜冰肌涼
悄然清唱多怨曲攪亂羈思為停觴輕飈忽來四座覺浮
動吹落桂子颯颯生秋香急令撾鼓歌慷慨驪龍掀舞白

鳳翔玉牀插天抱孤月醉卧萬里銀河長

望京府賞紅梅

汴梁宮中絳綃梅移向汴河堤上栽青條團圞

音搦

杏花顥

瑣細向陽才半開張公小隊呼我飲風色偃髯寒氣凜玉
銜徑踏黃河水貂帽颯簷掀紫錦金鞍細馬歌舞人雪壓
小橋不動塵入門下馬簇花宴紅蓮舊府花正新玉川金
波碧香酒折花遍插分素手春透寒梢未全綻風流正要
臙脂瘦賞梅不用歌落梅緩歌却著銀笙催愛香細擷生
霞藥浮動雲腴嚼一杯本是前村冷澹花不稱王侯將相
家明朝會散更向明月底藉雪凍吟踈影裏

黃山草聖歌

一從蔡党闢文源復有黃山黃華相後先黃山古雅尤老
成迫蔡埒党難重輕爲避時名便把黃華放一頭聲價亦
自雄周京澹薄翛然無宦情玉階寡鶴誤一鳴書法更比
詩文精正筆子瞻變真卿擘窠大字儼重極方停真行行
草至顛草獨步一代真豪英昨嘗中酒觀此本清風颯颯
吹我醒卷軸甚大總是學易詩如如縱筆自在綰墨繩正
是莊生悟道書網破夢覺蝴蝶驚絲綸不收魚不食湛徹
盡見江底星鉉華洗淨出玉骨無意偶與閑雲行中間態
度自關鑠剪裁不斷還相縈徃徃筆不盡點綴藏適緊初

疑不附著字字相犄角二王沒後無草書顛張醉素空模
糊只除洛陽楊風子認得黃山趙蹇驢

三峯山行

朔方善爲幹腹兵豈肯掠地還攻城北王戰罷馬首廻十
年大軍不南行西域既定殺李王疾雷破柱關中驚鷲鳥
匿形深且蟠汴梁不悟空椎冰小關幸勝未足多舉朝刻
日期中興都人盡喜識者懼俄聞遶出西南路突騎一夜
過散關漢江便著皮船渡襄陽有兵隔岸看鄧州無人渾
不顧縱入腹心將安歸彼騎豈足當吾步脫兔一去不可
及却兵洛澗苻堅誤日日鏖戰深且艱我帥益忙敵亦閒

短兵相擊數百里孤窮轉鬪甲盡殷直向虎穴探虎子既
入重地寧肯還掃境盡至欲一賭前後百匝相回環就中
真人有天命躍馬直上三峯山黑風吹沙河水竭六合乾
坤一片雪萬里投會卷土來鐵水一池聲勢接丞相舉鞭
揮鞬音帖言大事已去吾死節彥章雖難敵五王並命入敵
身與決逆風生塹人自戰冰滿刀頭凍槍折一敗塗地真
可哀鉤臺變作髑髏血二十萬人皆死國至今白骨生青
苔壕塹已平不放箭城門著礮猶自開大臣壅蔽骨肉疎
事急又送曹王來至了不去誤國賊向非汝南死社稷欲
爲靖康不可得

青城行

壞山歷城殺氣黑一夜京城忽流血弓刀合沓滿掖庭妃
主喧呼總狼籍驅出宮門不敢哭血淚滿面無人色戴樓
門外是青城匍匐赴死誰敢停百年涵育儘塗地死霧不
散昏青冥英府親賢端可憐白首隨例亦就刑最苦愛王
家兩族二十餘年不曾出朝朝點數到堂前每向官司求
米肉男哥女妹自夫婦覩面相看冤更酷一旦開門見天
日推入行間便誅戮當時築城爲郊祀却與皇家作東市
天興初年靖康末國破家亡酷相似君取他人旣如此今
朝亦是尋常事君不見二百萬家族盡赤八十里城皆瓦

礫白骨更比青城多遺民獨向王孫泣禍本骨肉相殘賊
大臣蔽君尤壅塞至今行人不數承天門行人但嗟濠利
宅城荒國滅猶有十仞牆牆頭密匝生鐵棘

照碧堂行

熒惑入斗終下殿哭廟背城爲一戰怒龍飛去轟霹靂震
碎乾坤掃孤電倉皇不乘破竹勢苟且只與姦臣便旌旗
慘澹入宋州爭似全師祇守汴四郊皆壘彈丸城玩主潛
生肘腋變官奴闖茸本驚下輒敢鳴張學韓建宮中梟獍
有小錘密結兇渠欲爲亂公卿誅徒威權去左右俄空侍
衛換開門日日向敵言旦夕須將天子獻事急壯士能感

激決計惟當下手先卿爲其易朕爲難傳呼便詔將軍見
升堂進謁遽令前太阿倒持仍便看王敦但覺赤日歷全
忠甚駭浹背汗倚門力士驚盼瞠面無肉色復肉膾同膽
定徐徐索劍還徑斫逆賊肩臂斷照碧堂紅血滿壁手刃
不覺御衣濺顧盼黨與背就禽禁蹕忽清祆霧散此時便
亡心亦足外敵雖強無內難臨危突兀翦強臣絕地求生
未曾見古來惟有敬宗奮袂誅爾朱今朝天興拔劍斫官
奴壯哉兩君萬古無嗚呼兩君萬古無

汝南行

將軍死綏君社稷炳烺義所不可惑青衣行酒豈能活肉

袒牽羊祗辱國初從貞祐棄燕雲赤氣半天開斗極又絕
西夏撤藩垣枝葉縱存無本實不問朔漠攻蘄黃敗盟要
利增讎敵區區一道當數面賦稅重繁兵役急宮闈意忌
踈骨肉陪貳從諛專壅塞比時久已當破滅况復奔播何
嗟及天興不是亡國主不幸遭逢真可惜十年嗣位稱小
康若比先朝少遺失汴梁不守大事去黃陵潰散焉敢北
險阻艱難氣益振照碧堂中親討賊孤軍轉戰入汝南作
氣蟠鋒轉深壁日夜望有勤王師以廢爲興賴忠力闕闕
誰意叛武仙感慨從爲歎仲德雙鷄旣盡麴屑空重圍益
堅負戶汲池戰水涸還登陴城隍斫樹埋巷柵空拳無皮

短兵盡戰士嚼齒猶憤激譙門闢碎鬪尤甚肉薄似牆當
劒戟雖知力竭不可救氣數儘窮心未畢慨然傳位誓衆
死音彩凜凜不動色一百餘年作天子與國俱亡在今日
哀哉雉頸復自楚將相血視不敢泣互爲拏髻相刺刀往
徃刎頸屍狼藉須臾衆踣若崩山汝水不流波盡赤黑風
裂天灰燼飛紅雪亂攙深數尺島中自殺五百人義烈只
數田橫客何國君君死國臣死君數萬同死死所得還聞
露布到江南城南夾攻平汝南莫言解復九世讎三韓有
靈應益慚

金源十節士歌